

Universitato de Brazilo ekinstruas Esperanton

Esperanto oficiale eniris en la kursaron de Universitato de Brazilo (UnB). La Internacia Lingvo alkalkulas sin al la nombro de la 12 aliaj idiomoj instruataj en tiu institucio. La ĉefa celo estas la preparado de instruistoj. La lecionoj okazos en la Campus Asa Norte, du fojojn semajne, sub la kunordigo de Paulo Nascentes kaj Jozias Barboza.

SAT-aranĝo pridiskutas naciismon kaj tutmondigon

Aŭguste okazis la 85-a Kongreso de Sennacieca Asocio Tutmonda (SAT). La temo estis kontraŭdiro inter kresko de naciismo kaj tutmondigo. La aktivaj havis lokon en Jalto, suda regiono de Ukrainio. La programo konsistis el prelegoj, debatoj kaj ekskursoj, krom teatra, kina, kanta kaj danca prezentadoj.

(www.satesperanto.org)

Facila Vento: Tekstoj en stilo simpla por lernantoj

Daŭre funkcias glate la paĝaro Facila Vento. La iniciato celas liveri al lernantoj tekstojn en simpla stilo, kun fundamenta vortprovizo. Laŭ la kunordiganto de tiu projekto, la brazila instruisto Emilio Cid, la lernantoj pligrandigas sian intereson, kiam ili konstatas, ke ili sukcesas legi kun pli da lerteco ne bezonante konstante konsulti la vortaron. Cid fine asertis, ke novaj esperantistoj ekfidis sin, iom post iom plialtigante la nivelon de la legaĵoj.

(<http://facila.org>)

Eŭropa Esperanto-Unio organizis kongreson en Irlando

Julie okazis la Kongreso de Eŭropa Esperanto-Unio (EEU) sub la aŭspicio de la Irlanda ŝtatprezidanto Michael D. Higgins. La aranĝo havis lokon

en Galivo. Proksimume 160 homoj el 28 landoj, ĉefe Eŭropaj, sed ankaŭ venis gastoj el Kubo, Brazilo, Japanio kaj Usono. Oni kunsidis pri juro, ĵurnalismo, edukado kaj literaturo. La kultura parto konsistis el muzika, danca kaj teatra prezentadoj. Koncertis la muzikistoj Georgo Handzlik kaj JoMo. La venonta kongreso okazos en Julio 2014 en Nitra (Slovakio). (www.europo.eu)

Google kaj la Kanada kompanio Cirque du Soleil: „Movi. Kanti. Revo.“

La informadika firmao Google kaj la Kanada kompanio Cirque du Soleil lanĉis projekton kies nomo estas en Esperanto. Ties titolo estas Movi. Kanti. Revo. Temas pri sensora eksperimento, kiu esploras novan formon por navigi en la komputila mondo. La prezentado taŭgas por elmontri la novan tridimensian teknikon de la interreta navigilo Google Chrome. La spektantoj sekvas misteran gastigantinon kaj uzas gestojn kaj sonojn por navigi en la etoso kreita de la cirka trupo.

(ekz.: www.youtube.com/watch?v=p-bAgz5kiL4)

OSIEK-premio al Ertl por traduko de „Sensorteco“

La ĉi-jara OSIEK-premio, kiu valoras 700 Eŭrojn, estis prijuĝita al István Ertl, pro lia Esperanta traduko de „Sensorteco“, la ĉefverko de la nobelpremiita Hungara verkisto Imre Kertész. OSIEK (Organiza Societo de Internaciaj Esperanto-Konferencoj) ĉiujare atribuas la premion pro „kultura kreaĵo nefikcia“. En 2009 la premion ricevis Spomenka Ŝtimec pro sia „Kroata milita noktlibro“. En 2010 kaj 2011 estis premiitaj tradukoj el la islanda kaj ĉina literaturoj, de Baldur Ragnarsson kaj Laulum. (www.liberafolio.org)

(<http://osiek.org/iek/index.php>)

ILEI-konferenco en Ĉinio kun altranguloj

La 45-a konferenco de Internacia Ligo de Esperantistaj Instruistoj (ILEI) estis solene malfermita en Kunming en sudokcidenta Ĉinio, Sabate la 21-an de Julio. La inaŭguron ĉeestis senprecedenca kvanto de altrangaj oficialuloj. La konferenco okazas en la Profesia Artkolegio de Kunming kaj daŭras ĝis la 26-a de julio. Interalie estis elektita nova estraro.

(www.ilei.info)

UEA en UN-kunsido pri indiĝenaj popoloj

Julie okazis ĉe Unuiĝintaj Nacioj en Ĝenevo la 5-a sesio de la fakula kunsido traktanta la tutmondan situacion koncerne rajtojn de indiĝenoj, „Ekspertaj Mekanismoj pri la Rajtoj de Indiĝenaj Popoloj (EMRIP)“. Reprezentantoj de UEA Verena Graf, Cesco Reale kaj Stefano Keller partoprenis la eventon, kiun ĉeestis delegitoj de indiĝenaj popoloj el ĉiu kontinento kaj membroj de NRO-oj defendantaj indiĝenojn. La rezulto de la EMRIP-kunsido, kiu okazas unufoje ĉiujare, estos plutraktataj de la Homrajta Konsilio de UN.

(www.uea.org)

Fettes ebla sekva prezidanto de UEA

La elekta komisiono de Universala Esperanto Asocio opinias ke Mark Fettes estus taŭga kandidato por la posteno de prezidanto en la elekto okazonta post unu jaro en Rejkaviko. Lia nomo estas la sola, kiun la elekta komisiono mencias en sia raporto, sendita al la komitatoj de UEA sojle al la Universala Kongreso en Hanojo, malfermita la 28-an de Julio. En intervjuo de Libera Folio Mark Fettes rakontis, ke li interesiĝas pri la propono. Tamen lia eventuala fina konsento dependas de tio, kian estraran teamon li gvidus. „Mi serĉas homojn,

kiuj montris sian kapablon kunlabori 'kun longa spiro' kaj kiuj kredas je la neceso kaj ebleco de fundamentaj ŝanĝoj en UEA, tamen kun respekto al ĝia karaktero kaj tradicioj", li inter alie diras. (www.liberafolio.org)

Nova aprobata Comenius-projekto

La projekto kun la titolo „Vizito de la loka kastelo al la Eŭropa domo - A Guided Tour from the Local Castle to the European House“ ricevis aprobon. Ĝi daŭros dum 2 jaroj inter 2012-2014 inter mezlernejoj en Herzberg am Harz en Germanio, Győr en Hungario kaj Mazaradelfalo en Italio. Kiel 4-a partnero povos aldoniĝi lernejo el Zagreb, kiu estas momente en atendolisto. La projekto estas formulita de Zsafia Korody kaj Ewa Kukielka el Herzberg.

(Zsafia Korody,
Interkultura Centro Herzberg)

Informo pri Esperanto en Vienaj metroo-stacioj

„Infoscreen“ estas sistemo kiu per grandaj ekranoj en metroo-stacioj montras video-programon kun novaĵoj, kulturaj informoj, veter-prognozoj kaj varbado. En Julio videblis informo kun tiu ĉi germanlingva enhavo: 1-a bildo kun la jubilea simbolo kaj „125 jaroj de Esperanto – Saluton“; 2-a bildo kun foto de Zamenhof kaj la teksto „Tiel oni salutas en la pont-lingvo kreita de Ludoviko Lazaro Zamenhof. Ĝi interligigas homojn de ĉiuj patrinaj lingvoj. Ankau en Vieno ekzistas Esperanto-asocio“.

(Yahoo-grupo aŭstraj esperantistoj)

Nova ESF-filio mastrumos la retejon Lernu kaj aliajn retajn projektojn

Esperantic Studies Foundation (ESF) fondas filion por mastrumi la daŭran disvolvado de projektoj kiel lernu.net, la bone konata multlingva retejo

por lerni Esperanton. En Montrealo, Kanado, dum sia jara strategia sesio, la ESF-estraro nomumis Erin Piatieski kiel fonda ĝeneralan direktoron de la nova kompanio ESF-enrete. „Nia celo estas igi la diversajn retprojektojn finance memstaraj, kaj samtempe certigi ke tiuj projektoj ne ekdominos la tutan prioritataron de la Fondaĵo“, diris ESF-prezidanto Mark Fettes. Subtenantoj povas donaci al la kampanjo „100 000 eŭroj por ESF“ <http://kampanjo.iks.net/eo/>. (www.esperantic.org)

Asocio Germana Lingvo pri Esperanto

En sia informa retletero la asocio raportis pri Esperanto, ties historio kaj citas la Britan programiston Gavan Fantom, kiu diras, ke Esperanto alportas diversecon en la vivon kaj kunligas homojn; cetere li opinias, ke estas problemece aprobi la Anglan kiel mondvastan, universalan lingvon, ĉar ĝi estas politika lingvo kaj denaskuloj havas privilegion kontraŭ la ne-denaskularo.

(www.maerkischeallgemeine.de)

Nova senpage e-libro „Maigret hezitas“ de Georges Simenon

En la retejo de Sezonoj/La Ondo de Esperanto ĵus aperis la romano „Maigret hezitas“, tradukita en Esperanton de Daniel Luez kaj eldonita de „Sezonoj“ en 1999. „Maigret hezitas“ estas la 11-a ero en la serio „Virtuala Biblioteko de Sezonoj“. Ĝi kaj 13 pliaj e-libroj de „Sezonoj“ estas senpage elŝuteblaj en la prezentomanieroj (formatoj, dosierformoj) pdf kaj epub.

(<http://sezonoj.ru/2012/07/maigret/>)

Du novaj Honoraj Membroj de UEA

En la inaŭguro de la 97-a UK en Hanojo estis anoncita la decido de la Komitato de UEA pri la elekto de Hori Jasuo el Japanio kaj Georgo Nanovszky el Hungario kiel Honoraj Membroj de UEA. Legu pli: <http://uea.org/dokumentoj/komuniko/>

gk.php?no=463#l

(Gazetaraj Komunikoj de UEA)

Novaj-retejo

NOVAĴOJ estas aktuala novaĵejo en Esperanto, kie oni povas trovi ĉiutagajn informojn de la plej elstaraj novaĵ-agentoj en Esperantio, kiel Ĉina Radio Internacia, Monato: la Internacia Magazino Sendependa, Muzaiko - la retejo de Neniam Milito Inter Ni, Eŭropa Civitano, Le Monde diplomatique en Esperanto, k.t.p. NOVAĴOJ ankaŭ prezentas raportojn de video-ĵurnalistoj Maximiliano Catania, Fábio Monteiro kaj Wilson Foo.

(<http://novajhoj.weebly.com/index.html>)

Harry Harrison forpasis

La renoma verkisto Harry Harrison forpasis la 15-an de aŭgusto en Crowborough (Anglio). Li naskiĝis la 12-an de Marto 1925 en Stamford (Usono). Harrison lernis Esperanton en sia junaĝo kaj estis membro de UEA jam ekde 1945. En 1985 li estis elektita al la Honora Patrona Komitato de UEA. Li estis ankaŭ honora prezidanto de Esperanto-Asocio de Irlando kaj honora membro de la Usona landa asocio Esperanto-Ligo de Norda Ameriko (nun Esperanto-USA). Harrison famiĝis pro siaj sciencfikciaj romanoj, en kiuj ofte aperas mencioj pri Esperanto kiel lingvo de la estonta mondo kaj ankaŭ specimenaĵoj en Esperanto, kvankam ne ĉiam en ortodoksa formo. La plej fama parto de lia verkaro estas la serio pri la „Rustimuna Ŝtalrato“. Unu libro de la serio, La naskiĝo de la Rustimuna Ŝtalrato, aperis en Esperanta traduko en 1996 ĉe Sezonoj kaj estas nun senpage elŝutebla. En 2001 Impeto eldonis tradukon de lia romano *La kaptita universo*, kiu, voĉlegita de la tradukinto Andrej Grigorjevskij, en 2004 aperis ankaŭ sur kompakta disko. (Gazetaraj Komunikoj de UEA) (<http://esperanto.org/Ondo/Libroj/Libroj.php>)

Kolektis kaj prilaboris Uwe Stecher